

## **Raja Muda Perlis Gesa Universiti, IPT Anjur Aktiviti Seni Secara Berkala**

KANGAR, 2 Mac (Bernama) -- Raja Muda Perlis Tuanku Syed Faizuddin Putra Jamalullail menggesa universiti awam dan institusi pengajian tinggi menganjurkan aktiviti seni secara berkala dengan tumpuan kepada seni dan budaya pelbagai kaum.

Baginda bertitah agensi atau persatuan seni juga harus merancang aktiviti seni dan budaya di setiap kawasan melalui penganjuran seminar atau wacana.

Tuanku Syed Faizuddin bertitah muzik, teater, seni lukis, tarian, koreografi, penulisan kreatif, dan kraf merupakan manifestasi tamadun kehidupan masyarakat sesebuah negara yang menjadi asas kepada pelengkap kehidupan berkualiti.

"Peranan seni budaya berkualiti telah diterima sebagai penyumbang kewujudan masyarakat dan bangsa berkualiti," titah baginda pada majlis penutupan Pertandingan Tarian Tradisional Di Bawah Pemerintahan Diraja di Dewan Kapitol Universiti Malaysia Perlis (UniMAP) di sini, Rabu.

Baginda bertitah kegiatan seni budaya harus dipergiatkan dengan mewujudkan sistem pendidikan formal khusus untuk aktiviti seni budaya di peringkat sekolah lagi.

"Jika ia tidak dipelajari secara formal dan ilmiah, ia akan terus kekal sebagai satu aktiviti yang hanya diselitkan dalam majlis-majlis kebudayaan sahaja," titah baginda.

Baginda bertitah masyarakat juga mesti membuang stigma negatif terhadap pengamal dan kerjaya berkaitan kesenian dan kebudayaan.

Raja Puan Muda Perlis Tuanku Hajah Lailatul Shahreen Akashah Khalil turut berangkat ke majlis itu.

Turut hadir Pemangku Naib Canselor UniMAP Prof Datuk Dr Zul Azhar Zahid Jamal dan Penasihat Menteri Pengajian Tinggi, Datuk Prof Emeritus Dr kamarudin Hussin.

**Dikeluarkan oleh:**

**Media UniMAP**